

आकाशवाणी

खबरां -----

1. जम्मू-कश्मीर दे रामबन जिले च जंदी रातीं आए दे चानचक्क हाड ते जिमी धंस्सने आहिलएं घटनाएं च 3 जनें दी मौत, 100 कोला मते लोकें गी सुरक्षित बचाई लैता गेआ।
2. उपराज्यपाल मनोज सिन्हा ते मुखमंत्री उमर अब्दुल्ला होरें आखेआ ऐ जे राहत ते बचाऽ कम्म जारी न ते प्रशासन जमीनी स्थिति पर ध्यान केंद्रित करै करदा ऐ।
3. जम्मू-श्रीनगर राश्ट्रीय जरनैली शिडक गड्डिएं दी आओजाई लेई बंद। फिलहाल ऐतिहासिक मुगल रोड गी मतवादल रस्ते दे तौरा पर खालेआ गेदा ऐ।
4. भारतीय जनता पार्टी नै लोकें च वक्फ संशोधन कनून बारै जागरूकता पैदा करने लेई इक्क दोशव्यापी अभियान शुरू कीता ऐ।
5. कनाडा च इक गुरुद्वारा साहेब पर हमला। इस पवित्र अस्थान पर होई दी भन्न-त्रोड दी घटना दी बड्डे पैमाने पर निंदेआ कीती गई ऐ।
6. प्रधानमंत्री नरेंद्र मोदी अतरूं साउदी अरब दी यात्रा पर जेद्दा जा करदे ना।
7. भारती ब्हाई फौज दा इक दल डेजर्ट फ्लैग 10 भ्यास च हिस्सा लैने लेई संयुक्त अरब अमीरात यू.ए.ई पुज्जी गेआ ऐ।
8. आई.पी.एल च अज्ज रायल चैलेंजर्स बेंगलुरु नै पंजाब किंग्स गी 7 विकेटें कन्नै हराया। दूआ मैच मुम्बई इंडियन्स ते चिन्नेई सुपर किंग्स बश्कार मुम्बई दे वानखेडे स्टेडियम च होग।

J&K Flash Flood

जम्मू-कश्मीर केंद्र शासित प्रदेश च रामबन जिले दे इक्क ग्रांड च अजज बडुलै बडी मती बरखा करियै चानचक्क आए दे हाड च त्रै बसनीके दी मौत होई गई। उआं तकरीबन 100 होर दुएं गी बचाई लैता गेआ। आकाशवाणी दे जम्मू संवाददाता नै दस्सेआ जे सारी रात बरी दी बरखा कारण अज्ज बडुलै रामबन जिले दे सेरी बागना इलाके च बद्दल फट्टने करी 3 जनें दी मौत होई गई। चानचक्क आए दे हाड करी तकरीबन 40 घरें गी बी नुकसान पुजाा ऐ। बद्दल फट्टने दे बावजूद मौके पर पुज्जे दे पुलस कर्मिये फसे दे 100 शा बद्द मकामी बसनीके गी बचाया। रामबन दे डी.सी बसीर उल हक होरें आखेआ ऐ जे लगातार बरखा, ल्हास-पस्सियां, कुप्पड पौने ते चानचक्क आए दे हाड नै जिले च जम्मू-श्रीनगर राश्ट्री जरनैली शिडक पर केई इमारतें ते किश गड्डिये गी बी नुकसान पुजाया ऐ। तोआई, केंद्री मंत्री डॉ. जितेंद्र सिंह होरें इक सोशल मीडिया पोस्ट च आखेआ जे प्रभावित लोके गी माली ते होर दुई हर चाल्ली दी राहत दित्ती जा करदी ऐ। डीसी होरें'गी दस्सेआ गेआ ऐ जे होर बी चीजे-बस्ते दी जेकर लोड पोंदी ऐ ते सांसद हुंदे निजी साधन वसीले थमां मुहैया करोआया जाई सकदा ऐ। उनें अपील कीती ऐ जे घाबरने दी कोई लोड नेई ऐ ते अस्स रलियै इस कुदरती क्रोपी कन्नै निब्बडी लैगे।

<><><><><><>

J&K Flood

जम्मू-कश्मीर दे उपराज्यपाल मनोज सिन्हा ते मुखमंत्री उमर अब्दुल्ला होरें रामबन जिले च चानचक्क आए दे हाडै करी होए दे जानी ते माली नुकसान पर दुख प्रगट कीता ऐ। मुखमंत्री उमर अब्दुल्ला होरें आखेआ ऐ जे फिलहाल जमीनी सतह पर हालात पर काबू पाने बक्खी ध्यान केंद्रित कीता जा'रदा ऐ।

<><><><><><>

Kishtwar-Rainfall

बड़ी मती बरखा बरने, शमानी बिजली, ल्हास पस्सियां ते कुप्पड़ पौने करियै किशतवाड़ पाडर शिड़क बंद होई गई ऐ जिस कारण मचेल माता दे दर्शनें आस्तै जाने आहले यात्रुएं गी दिक्कतें-परेशानियें दा सामना करना पेआ। किशतवाड़ पाडर रस्ते दा इक्क बड्डा हिस्सा अज्ज पत्थर नाकी थाहर बेई गेआ जेदे कन्नै समूलचे पाडर सब डिविजन दा राबता बाकी जिले थमां कटोई गेआ। पत्थर नाकी इलाके च आई दी इस कुदरती क्रोपी कारण तकरीबन 22 परोआर प्रभावित होए न। जिला प्रशासन नै प्रभावित परोआरें गी सुरक्षित थाहरें पर पजाइयै टेंट ते होर दुआ लोडचदा समेयान उपलब्ध करोआया ऐ।

<><><><><><>

NHW-Closed

रामबन जिले च लगातार बरा रदी बरखा करी महत्वै आहली जम्मू-श्रीनगर राश्ट्री जरनैली शिड़क एन.एच-44 पर नाशरी ते बनिहाल बश्कार तकरीबन इक्क दर्जन थाहरें पर ल्हास-पस्सियां ते कुप्पड़ पौने ते जिमी दे बेई जाने कारण गड्डियें दी आओजाई गी रोकना पेआ ऐ। चानचक्क आए दे हाड़ च केई गड्डियें दे रूढी जाने दी खबर ऐ। नाशरी ते बनिहाल सैक्टर बश्कार प्रभावित थाहरें गी गड्डियें लेई सुचारू बनाने ताई मरम्मत दा कम्म चला करदा ऐ पर खराब मोसम दे चलदे एहदे च रूकावट आवा करदी ऐ। लोकें गी सौहगा रौहने ते सुरक्षा दिशा-निर्देशें दी पालमा करने दी सलाह दिती गई ऐ। जिला प्रशासन नै 24 घंटे सत्तो ध्याड़े चलने आहले इक्क नियंत्रण कक्ष दी स्थापना कीती ऐ जित्थें मदाद ताई अमरजैसी संपर्क नंबर जारी कीते गेन। नंबर ऐन 01998-295500 ते 01998-266790..। तोआई, ऐतिहासिक मुगल रोड जेड़ी जम्मू खितते दे राजौरी ते पुंछ सरहदी जिलें गी कश्मीर घाटी दे शोपियां कन्नै जोड़ने आहली वैकल्पिक राश्ट्री जरनैली शिड़क गी कल बर्फबारी मगरा बंद करने बाद अज्ज पुंछ थमां शोपियां लेई हल्की मोटर गड्डियें लेई खोल्ली दित्ता गेआ ऐ। गड्डियें गी बहरामगला बफलियाज थमां 3 बजे तगर गै अगगे जाने दी खुल्ल होग।

<><><><><><>

Chenab-Level

पिछले द'ऊं दिनें थमां उप्परोतली पवारदी बरखा कारण चनाऽ च पानी दा स्तर लगातार बददा जा करदा ऐ। इसी ध्यानै च रखदे होई रियासी जिला प्रशासन नै चनाऽ दे कंडे आहले इलाकें च अलर्ट जारी करदे होई लोकें गी सौहगा रौहने दी सलाह दिती ऐ। सुरक्षा उपाएं दे तौरा पर अज्ज चनाऽ राफिंग दियां सब्बै गतिविधियां मुअत्तल करी दिती गेइयां ना। लोकें गी टकोहदे तौरा पर चनाऽ कश हेठले इलाकें च रौहने आहले लोकें गी दरेआ थमां दूर रौहने दी सलाह दिती गेई ऐ।

<><><><><><>

BJP-Waqf

भारतीय जनता पार्टी नै वक्फ संशोधन कनून दे फैयदें दे बारे च लोकें गी जागरूक करने लेई इक राष्ट्रव्यापी अभियान दी अज्ज शुरूआत कीती ऐ। वक्फ सुधार जागरण अभियान नां दी एहू मुहिम 5 मई तगर चलोग। इस अभियान दे तैहत बीजेपी दे नेता ते कार्जकर्ता, मुसलमानें च जाई-जाइयै उनेंगी इस कनून कन्नै होने आहले फैयदें दे बारे च दस्सडन ते उनेंगी इस बारै झूठा प्रोपोगेंडा करा रदे 'लोकें ते अफवाई बारै सौहगा करडन। एहदे शा पैहले बीजेपी दे राष्ट्रीय अध्यक्ष जे.पी नड्डा होरें विरोधी दलें पर वोट दी राजनीति करने ते वक्फ संशोधन कनून दे बारे च लोकें गी गुमराह करने दा आरोप लाया हा। उनें आखेआ जे तरमीम दे बाद आंदे गेदे नमें कनून कन्नै गरीब, कमजोर ते पिछड़े वर्गें दे मुसलमानें गी मता फैयदा पुज्जोग ते उन्दे जीवन स्तरै गी उबडा चुक्कने च मदद थहोग।

<><><><><><>

Canada-Gurudwara

कनाडा च वैकूवर दे इक प्रमुख गुरुद्वारा साहेब च कल रातीं खालिस्तानी समर्थकें भन्न-त्रोड कीती ऐ जेदे नै सिख समुदाय दे लोकें च जबरदस्त रौह रौस्सा फैली गेदा ऐ। एहू घटना खालसा दीवान सोसायटी गुरुद्वारे च होई जिसी आम तौरा पर रास स्ट्रीट गुरुद्वारा दे रूप च जानेआ जंदा ऐ। गुरुद्वारा प्रशासन नै अपने आधिकारिक सोशल मीडिया प्लेटफार्म एक्स पर किश तस्वीरां सांझियां

कीतियां न जिंदे च गुरुद्वारे दी पार्किंग दे आले-दोआले कन्धें पर खालिस्तान जिंदाबाद स्प्रे पेंट कन्नै लिखे दा ऐ। कनाडा मीडिया दिएं रिपोर्टें मूजब वैकूवर पुलस विभाग घटना दी जांच करै करदा ऐ।

<><><><><><>

Russia-Ukrain

रूस दे रक्षा मंत्रालय नै अज्ज यूक्रेन पर राष्ट्रपति व्लादिमीर पुतिन हुंदे आसेआ घोषित 30 घंटें दा इस्टर युद्ध विराम गी त्रोज़ने दा आरोप लाया ऐ। उत्थे गै यूक्रेन दे राष्ट्रपति व्लादिमीर जेलेसकी होरें आखेआ जे रूस नै इक तरफा युद्ध विराम दी घोषणा दे बावजूद बी हमला जारी रक्खेआ ऐ। ताजा झडप्फ दी अदला-बदली होई ऐ। मीडिया रिपोर्टें मूजब संयुक्त अरब अमीरात दी पैंची आहले सौदे च दौनें पक्खें दे 246 सैनिकें दी अदला-बदली कीती गई ऐ।

<><><><><><>

Bhutan-King

भूटान नरेश जिगमे खेसर नामगयाल वांगचुक होरें अज्ज जोगीधोपा च अंतर्देशीय जलमार्ग टर्मिनल ते मल्टी मॉडल लॉजिस्टिक पार्क सुविधाएं दा निरीक्षण करने लेई असम दा दौरा कीता। विदेश मंत्रालय नै जानकारी दिती ऐ जे एह सुविधां बपार ते क्षेत्रीय विकास गी बढ़ावा देने पर केंद्रित संपर्क दियां दऊं प्रमुख परियोजनां ना। विदेश मंत्रालय मूजब गोआंडी सब्बनें शा पैहले आहली नीति दे हिस्से दे रूपै च केंद्र सरकार लोके-लोके बश्कार सरबन्धें गी बढ़ावा देने ते भूटान कन्नै बपार ते आर्थिक सहयोग गी सुविधाजनक बनाने लेई कई उपाऽ करा करदी ऐ। कल असम पुज्जने पर भूटान नरेश हुंदा निग्गा सुआगत कीता गेआ हा।

<><><><><><>

RBI-Governor

भारतीय रिजर्व बैंक दे गवर्नर संजय मल्होत्रा होरें आखेआ ऐ कि देश दा विदेशी मुद्रा बजार पिछले 4 बरें च करीब दूना होई गेआ ऐ। बाली च आयोजित इक सम्मेलन च बोलदे होई संजय मल्होत्रा होरें

आखेआ जे पिछले किश बरें च भारत दे माली बजार च मती तेजी आई ऐ ते एहदे च खरा-मता लचीलापन बी दिक्खेआ जा'रदा ऐ। एह बरा 2020 दे 32 अरब डालर दे मुकाबले 2024 च 60 अरब डालर होई गेआ ऐ।

<><><><><><>

Search-Operation Kathua

सुरक्षा बलें अज्ज बडुलै कठुआ जिले दे हीरानगर सैक्टर च पौंदे ग्रांS रसाना च तपाशी अभियान रम्भ कीता। आकाशवाणी दे जम्मू संवाददाता नै दस्सेआ जे इलाके च शुबे आहली नक्लो हरकत बारै टकोहदी सूह थ्होने परैंत बलें अभियान रम्भ कीता। चौकस बलें बडुलै-बडुलै गै ग्रांS गी घेरे च लेइयै व्यापक तपाशी शुरू करी दिती जेडी अजें जारी ऐ। इस सरबंध्यै च होर जानकारी गी बलगेआ जा करदा ऐ।

<><><><><><>

Search-Operation Poonch

पुंछ जिले दी सुरनकोट बेल्ट दे लसाना इलाके च सेना ते जम्मू-कश्मीर पुलस आसेआ रम्भ कीते गेदा सांझा तपाशी अभियान अज्ज 6में ध्याड़े बी जारी रेआ। ध्यानजोग ऐ जे लसाना इलाके च सेना दे काफले पर होए दे आतंकी हमले परैंत शुरू कीते गेदा एह अभियान शाहसितार, गुरसाई, सनाई, लसाना ते शींदार टाप ज्नेय इलाकें सने तकरीबन 20 वर्ग किलोमीटर च तपाशी ते निगरानी कन्नै तेज होई गेआ ऐ। हमलावरें गी फगड़ने ताई सुरक्षा बल ड्रोन, खोजी कुतते ते सी.सी.टी.वी फुटेज दा इस्तेमाल करा करदे न।

<><><><><><>

PM-Saudi Arab Tour

प्रधानमंत्री नरेंद्र मोदी होर 22 अप्रैल गी साउदी अरब दे 2 दिनें दौरे पर जेद्दा जाड्ना पिछले 4 दाहके च एह कुसै भारती प्रधानमंत्री दी जेद्दा दा पहला दौरा होगा। साउदी अरब च भारत दे राजदूत सुहेल एजाज खान होरें प्रधानमंत्री हुंदे इस दौरे दे महत्व गी दस्सदे होई आखेआ जे श्री मोदी होर पहले 2 बारी साउदी अरब दा दौरा लाई चुके देन पर जेद्दा दी उन्दी एह पैहली जात्तरा होगा। उनें गलाया जे साउदी अरब कन्नै भारत दे रणनीतिक सरबंधें गी निगगर बनाने दिये कोश्टें तहत एह दौरा बडा महत्वै आहला ऐ। जनाब खान होरें आखेआ जे जेद्दा दौरे पर भारत ते साउदी अरब बश्कार रक्षा ते उर्जा सहयोग दे कन्नै गै इलाकाई ते वैश्विक परिदृश्य कन्नै जुडे दे नेके महत्वे आहले मुद्दे पर बी गल्लकत्थ होने दी संभावना ऐ। उनें दस्सेआ जे साउदी अरब च 27 लक्ख भारती रौहंदे न, जेडे उत्थुआं दी अर्थ बवस्था च बडा योगदान देआ करदे ना। प्रधानमंत्री हुंदे इस दौरे दौरान साउदी अरब ते भारत बश्कार रणनीतिक सांझेदारी गी होर बी तगडा बनाने लेई नेकां अहम समझौते पर बी दस्तखत होने दी मेद ऐ।

<><><><><><>

IAF-UAE Excercise

भारती ब्हाई फौज दा इक दल डेजर्ट फ्लैग 10 भ्यास च हिस्सा लैने लेई संयुक्त अरब अमीरात यू.ए.ई दे अल धफरा एयरबेस पर पुज्जी गेआ ऐ। इस युद्ध भ्यास दी मेजबानी यू.ए.ई करै करदा ऐ जेदे च भारत दे अलावा आस्ट्रेलिया, बहरीन, फ्रांस, जर्मनी, कतर, साउदी अरब, कोरिया, तुर्की, बरतानिया ते अमरीका दियां ब्हाई फौजां बी हिस्सा लै करदियां ना। इस भ्यास दा मुख्क मकसद दुनिया दिएं सब्बनें शा बेहतरिन ते सक्षम ब्हाई फौजे कन्नै कारवाइएं, जानकारिएं ते नमिएं तकनीके दा आदान-प्रदान करना ऐ। कल शुरू होने आहला एह भ्यास औंदे म्हीने दी 8 तरीक तोडी जारी रौहगा।

<><><><><><>

IPL

आई.पी.एल च अज्ज 2 मैच खेड्डे जा'रदे ना। पैहला मैच रायल चैलेंजर्स बेंगलुरु ते पंजाब किंग्स बशकार खेड्डेआ गेआ। पैहले बल्लेबाजी करदे होई पंजाब दी टीम नै 20 ओवरें च 6 विकटें दे नुकसान पर 157द रन्ज बनाए जेदे परते च बेंगलुरु दी टीम नै 18 ओवर ते 5 गेंदें च 159 रन्ज बनाइयै पंजाब पर 7 विकटें दी जित्त हासिल कीती।

<><><><><><>

IPL

आई.पी.एल क्रिकेट च दुआ मैच संज्ञा मुम्बई इंडियन्स दा मुकाबला चेन्नई सुपर किंग्स कन्नै होग। मैच संज्ञा साड्डे 7 बजे मुम्बई दे वानखेडे स्टेडियम च खेड्डेआ जाग। 7एं मैचें चा छडे 2 मैच जित्तियै सी.एस.के इस्सलै अंक तालिका च हेठली थाहर पर ऐ ते जेकर उनेंगी इस मुकाबले बरकरार रौहना ऐ ते अपने बचे दे 7एं मैचें चा घट्टोघट्ट 6 मैच जित्तने होडना। इस्सै चाल्ली मुम्बई इंडियन्स दा हाल बी इयै नेआ ऐ। ओहू बी अजें तगर 3 मुकाबले गै जित्ती सकी ऐ। हालांकि बुमराह, सूर्य कुमार ते हार्दिक पांडेआ दे टीम च होने करी ओहू पास्सा पलटी बी सकदे ना।

<><><><><><>

Squash-World Championship

भारत दे वीर चोटरानी ते अनाहत सिंह नै अगले म्हीने अमरीका दे शिकांगो च होने आहली विश्व स्क्वाॅश चैंपियनशिप 2025 लेई क्वालीफाई करी लैता ऐ। वीर नै मलेशिया च आयोजित एशिया क्वालीफाइंग प्रतियोगिता दे पुरुषें दे फाइनल च मलेशिया दे अमीशनराज चंद्रन गी 3-0 कन्नै हराया। 5मीं वरीयता हासल 17एं बरें दी अनाहत नै महिलाएं दे इक्कले फाइनल मुकाबले च हांगकांग दी टोबीत्से गी 3-1 कन्नै हराया। विश्व चैंपियनशिप दे पुरुषें दे इक्कले वर्ग च हून कुल 4 भारतीय खडारी वीर चोटरानी, रमित टंडन, अभय सिंह ते वेलावन , सेंथिल कुमार हिस्सा लैंगन। दुई बक्खी महिला वर्ग च अनाहत महिला वर्ग च अनाहत अपनी पैहली विश्व प्रतियोगिता च हिस्सा लैडन। विश्व चैंपियनशिप शिकांगो च 9 मई कोला लेइयै 17 मई तगर जारी रौहग।

<><><><><><>